

彭澤縣志卷之九

列傳名循

邦賢
武功

忠烈
隱逸

孝義

篤行

儲君

兩大間日星河岳莫不有靈秀之氣存乎其間真洩
之也爲忠臣爲孝子爲義士仁人以及名儒碩彥潔
清隱逸之流皆足以當之古云十里之津香草生焉
况一邑乎彭澤襟帶江湖山水明秀前賢過化遺韻
猶存加以我

國家甄陶化育百餘年來知必有鍾靈毓秀者聯翩
蔚起考文徵獻首紀名循以重官師次列邦賢以彰
異等其或品望允合鄉評學行見重士類文藻堪傳
藝林者莫不詳誌而備錄之後之覽者亦將彷彿其

人耳志列傳

名循

晉

陶潛字淵明後以字爲名更字元亮潯陽柴桑人太尉長沙公侃之曾孫少高尚博學善屬文嘗著五柳先生傳以自况親老家貧起爲州祭酒尋解歸躬耕自資再起彭澤令八十餘日素簡貴不私事上官郡遣督郵至吏白當束帶見乃歎曰吾豈能爲五斗米折腰向鄉里小兒卽解印綬賦歸去來辭暨入宋終身不仕顏延年誄之諡曰靖節徵士世號靖節先生祀名宦別祀三賢

祠

唐

狄仁傑太原人字懷英封梁國公武后天授中爲來俊臣所誣貶彭澤令適歲大旱抗疏乞免民租武后嘉之特降制江州蠲免民間本年租稅歲除縱死囚三百人還家期五日至獄皆不失期奏釋其罪邑人爲之立生祠

五代

廖凝字熙績衡山人少隱居南岳江南賊起凝曰與其抱道以死孰與就義以存吾宗遂出爲彭澤令慕陶處士爲人已而笑曰淵明不以五斗米折腰吾寧久爲人役卽解印歸衡山有詩云五斗徒勞自折腰三年兩鬢爲誰焦今朝官滿重歸去還挈來時舊酒瓢可想其清

操矣

吳舉字大冲永興人南唐李煜時爲彭澤主簿宋興曹彬伐江南兵破池陽遣使徇下郡縣至彭澤令長欲以城降舉以大義責之曰吾能爲李氏死乃殺使者固守弗渝及煜降舉爲遊兵執送軍中曹彬責以殺使者罪舉曰敵國當如是爾彬義而釋之

宋

陳師道字無已號后山彭城人家酷貧博堯俞懷金贈之見其詞色自若不敢輒將其介如此以蘇轍薦授太學博士紹聖初坐黨禁謫台彭澤尋起館職嘗從上郊祀郊壇高寒非重裘莫禦公內子與趙挺之妻爲兄弟私假一錦裘衣之公詰所從來內子以實對公曰女知我着渠家衣耶擲弗服遂忍凍遊疾死生平苦吟每枕上覓句不得則不起或至累日景仰南豐嘗以文示會會爲削藁數十百言而意轉足有后山集行於世

馮扞字秉義南康都昌人寶慶間由進士任彭澤令性資質實豈弟慈祥吏民悅服無何引退今鳳凰山麓馮氏卽其後也邑稱巨族云

趙昂發字漢卿昌州昌元人由進士爲彭澤令政尚寬平以忠孝節義勵俗奸暴爲民患者必痛懲之嘗與邑人高竹澗講明性理之學爲士類倡後陞池州府通判元兵陷城不屈而死贈忠毅侯與陶狄二公並祀三賢祠

葉永齡字龜年南康星子人紹興中由進士任彭澤簿爲
政有體興學勸農民甚懷之

石 振字興宗紹聖間爲彭澤尉政興務舉民淳事簡建
稽古亭於鳳凰山之巖攜三子讀書其下黃庭堅嘉其
好學書讀書巖三字刻於石壁

元

馮克敏臨清人延祐間任彭澤簿修舉廢墜景行先哲刻
兩狄碑鑄小孤山鐵柱亦利濟一事也

和 裕字仲寬廣平人大德間舉孝廉授彭澤尉踵石尉
遺事建六角亭於讀書巖前公暇亦攜子讀書其中

焦從善字良輔號東澗武城人大德間任彭澤尉迎親就

養克殫孝思修廢舉墜振作斯民當時稱爲良吏

曹靖國至正間任彭澤尹蒞政尙寬制作以漸修譙樓新
縣廨平官道飭水驛建萬里江天亭復淵明祠晉城隍
廟士民仰德立惠愛亭志思焉

王國輔魯人至正間任彭澤縣令初至值水旱相仍民以
歎告公憂之不數日髭鬢皓然抗疏乞免民租詔許之

明

黃安泰湖廣蘄州人洪武元年令彭澤會兵燹後百度廢
弛公較定治體身勞民事頽廢者起治具畢張公仁廉
幹爲有明賢令之首

鄧 周字文郁廣東廉州人由監生授刑部照磨景泰間

爲彭澤令時多虎患公曰其咎在令禱於城隍虎遂引去邑多火災公曰此覆茅累也勸民陶瓦力不及者公爲措置不二三年比屋皆瓦火患遂息

常完字景裕淮安山陽人監生成化初知彭澤縣建議移龍城驛於小孤山遷峰山磯巡檢司於胭脂港減編馬船首戶分割鄱陽地界四事議雖未允議者遺之

葉朝榮曰小孤山離縣所十里移驛於此使節駐驛則縣奔走駑縣則驛奔走徬徨擾人未見其便也獨減編馬船首戶爲彭邑便舊志稱常完廉明公正撫字勤勞茲獨取四議豈足盡其爲循吏乎

凌杞字尙忠蘇州常熟人成化間以舉人令彭澤修墜

補敝百度具舉三載政行惠洽修邑志以紀文獻士民思之

徐俊浙江武義人監生宏治初由寧國府經歷擢知彭澤爲政有方吏民率服以八事頌之興學校廣街衢設津渡修古祠備災荒弭盜賊均賦稅簡詞訟二載致仕歸

何士鳳廣西蒼梧人正德中由舉人令彭澤律身清慎作與士類先是邑多廢弛一經振舉煥然改觀廨門有聯云袖有春秋筆門無暮夜金民稱是非明操守潔如其所書云

曾棠四川嘉定人字方名號懼菴進士正德時忤權奸

融令彭澤政尚簡要心存撫字囹圄幾空作興士類科第蟬聯

柯 遷字本升池州貴池人嘉靖初由監生令彭澤爲政簡易守己廉靜尤以興起學校爲任溽暑隆冬不廢訓課每登講堂橫經教士居彭六年有循良聲陞泉州通判

戴 璋廣西桂林護衛人嘉靖間令彭澤政尚寬平誠心率物遇事迎解案無留牘時當道尙嚴督公事之以正蝗蝻爲災抗疏免租士民德之

劉廷賓廣東三水人號龍陵嘉靖中由舉人令彭澤清約自持脫粟之飯不過一肉間爽樂易不矜奇以立名歲

大股移文開倉發粟併捐俸賑濟所活甚衆陞吉安府通判

朱公節字允中號東武浙江山陰人少豪雋慷慨溢於文詞嘉靖初領鄉薦後授彭澤令爲政芳潔時海寇竊發日閔士兵增修城守建東南二門寇不敢窺先是屯軍雜居境內蔑視令有爭訐輒走上官公節令每屯若干出操軍一丁班分之束以伍法給餉屯於小孤分直縣四門守衛同民兵訓練是後就縣官約束軍民一體矣政暇輒進士類訓課嘗題署曰公餘閉閣常思過夜靜焚香獨告天五年擢泰州知州

程鳳金湖廣黃岡人嘉靖間以舉人令彭澤獄無冤滯庭

無請謁景王就藩公不科派而供帳傳廚如額有廉能
聲士民生祠之有贖輒應益以爲神後直指按部上謁
稍後直指諷之曰相度當如是耶鳳金出曰御史所以
有權者能去人官也吾官自去御史何權遂賦詩懸縣
門而去直指旋悔遣牙官追之竟不反詩云平生惟拙
天知我三載無能我負官今日銓衡公論定好歸舊隱
理魚竿

高 裕應天溧陽人嘉靖末由舉人令彭澤任性恢廓不
趨時譽邑戶多虛糧賦役偏累丈均之作清田紀錄綱
列條析由是糧數役平催科不擾至今德之

雷時敏號觀泉湖廣崇陽人由舉人授彭澤令萬歷初建

議增高城垣三年建學造士論諸生以志伊學顏之道
辨義利明體用大要以養德性爲主分才德身心性情
氣識入事語在中丞勞堪學記遷景州牧邑人建去思
祠祀之後廢爲文孝宮今在普明寺內

陳夢斗順德人萬歷間由舉人令彭澤有節操不假囁笑
搜剔弊蠹奸宄無所容尋以內艱去

於可成仁和人萬歷間由鄉薦令彭澤縣苦府吏之蠹可
成釐傷之無所愷民有晉其母者可成聚衆數之泊如
律民咸知懼嚴究窩匪其黨盡匿他境以觀行士民送
者咸祝過歸及歸民間婦女亦私相慶慰曰我侯至矣
其得民如此

宋子恭四川榮經人萬歷間以歲貢知彭澤盡蠲無藝之
征催科定均限以時輸納不病早暮役夫更番畫一甲
乙無所容隱邑有飲人以藥而攫之金者匿其事十餘
年四鄰無知者一日公過其門鸚鵡自樓而下投袖中
公異之曰此必有冤訊之果得其狀置之法人以爲神
後左遷去士民如失父母

許伯鵬臨漳人萬歷間由鄉薦令彭澤取與無所苟縣有
魚池業甲之累伯鵬清其額課永奉爲例民至今感之
壁河州守

白紹光號鏡臺武進人由鄉薦授彭澤令居官清潔愛民
禮士歲大旱公暴日哀訴大雨如注槁苗復蘇秩滿奏

最擢吏科士民德之建祠闕廟之左過其祠者猶曰此
白慈母生祠也爲之淚下

張於廉四川內江人令彭澤仁以愛民義以去暴有循良
聲後致仕歸流賊張獻忠陷內江迫就僞職不從與妻
鍾氏罵賊而死

殷 嘒蘇州吳縣人永樂間由進士授編修謫彭澤教諭
善屬文行檢端嚴足稱模範一時科目得人之盛實其
造就力也

何 綸湖廣石首人天順中由進士任彭澤教諭學問純
實厭黜浮華屢典文衡秉公守正秩滿去士民懷之

胡 頤東莞人正德間任彭澤訓導遂於易學尤工於詩

教人以身先之喜怒不形士皆欽服

張一言字伯恕號可山廣東揭陽人嘉靖初由舉人任教諭德器深厚學有淵源教士循循引喻無間愚智構一寄亭於讀書巖前盤桓吟咏聲華勢利淡如也山左禮聘入闈簡拔公明遷令永明政聲丕著著北廵問目纂畧詠史詩註懷黃等集

余桂萼廣信人萬歷間由鄉薦任彭澤教諭持己方正爲政以禮讓廉耻爲先時湖口權稅厥闕李道勢炙當途他邑青衿多叩闕請謁桂萼與諸生約有赴厥投刺者非吾徒也當以蕩檢揭報故彭士獨全名節尋陞孝感縣令

趙善鳴字和甫廬陵人多聞博記工詞賦善書傾萬歷辛卯鄉薦除彭澤諭日集生徒講說不倦喻以恕爲童子時卽許以科第蜀聘分闈得人最盛累官至比部郎恤刑江北多所平反生平著書甚富行世者如巢雲館諸集今不悉記云

曠用賢廬陵人任邑教諭講學明倫以維持風化爲己任重修學宮竹頭木屑綜理密緻不減陶公建文昌閣於鳳凰山麓入名宦

國朝

董襄號澹園湯陰人崇禎壬午解元順治丁亥進士令彭澤居官廉正不附權勢與利革弊如免火耗除積盜

活寃民建學課士皆善政也邑苦欽贖累千公悉心措
畫贖完而民不擾丁酉分閩所拔皆一時名士解任日
老幼涕泣攀轅刻像祀之

李 遙號襄水河南睢州人甲午經魁己亥進士戊申除
令彭澤甫下車以邑水陸交衝役法無制請於臺司欲
均徭以紓民困時不能行後十餘年卒如公請民始獲
息肩時捕盜法過嚴有司率諱匿公獨善偵緝荏苒數
跡夜戶無驚坐累池陽盜案去民至今思慕焉

王廷藩江南六安人康熙間以舉人任彭澤令居心愷悌
雅意作人士民多愛慕之時縣苦里役公費率皆派累
藩憫之不妄取一錢捐俸倡修邑志去官日行李蕭然

至今思之

劉 進字子脩大興人陝西籍以貢任西安教諭卓異陞
彭澤令時吏治積弛上下因緣爲奸假命居奇其風尤
熾遭者身家立破良善重足而立進下車訪知其害寬
株連嚴反坐處積蠹民獲安堵自是輕生者亦少性明
決無留牘間有偏斷者察知其非旋即平反明言其過
不怙前非尤人所難解官日囊無一錢不能歸里寄居
潯陽艱苦萬狀數十年來廉明首推公而窮阨亦極廉
吏難爲天之報施固難測耶

李松泰字介石大興人由監生初令寶應乾隆元年調彭
澤律已甚廉才極敏事猝投輒剖斷平允絕諸媚直斥

不阿居彭十三載人情土俗熟悉靡遺執法嚴用情恕文武首選所拔多成科甲邑有佑官洲爲民害者公毅然詳請復舊至今口碑弗衰他如免冊糧立社倉修城垣固其所最著而議創書院振興士風於報佃沙洲內悉註柳洲學之名以爲異日膏火地士林中恒深歿後之思云

秦錫瑀山西曲沃人由進士選興安令乾隆十六年調繁彭澤時邑數易令案多塵積公精勤檢閱午夜不休五更起課子弟書聲琅琅然平明視事日結四五案俱無遁情不三月而積案漸理剔弊懲奸胥吏冰立以公往鄉爨飯自隨位以鹽菜紳衿邀請堅不往自奉清苦有

寒士所不堪者以勞瘁致疾半載卒於官貧不能歸土民樂助以貲白衣冠送者數千人蒞彭者清勤以公爲首稱至不苛求短封兵米率用平糶尤人所難云

熊夢求字巖叟瑞州新昌舉人太史熊暉吉之父也補彭澤諭訓諸生首分別義利畧脯脩勤勸課士習翕然興起終日危坐一室無私謁縣或牒以事却不受諸生有因小忿致訟者毅然曰由吾教化未至當自罰嘗捐俸以息爭自是有爭者多愧悔中止曰毋使熊先生知也杜道坦南昌名宿杜果子父歿家中落貧幾不能自存痛自刻勵書法詩文名流雅重以甲午舉人任彭澤教諭倡修學宮夙夜勤勞精白乃心陞廣東教習卒於官

賀敦珠承新人以恩貢任彭澤教諭性耿介有訟諸生者非關倫化不受詞謂造士者正當養其廉恥非曲徇也栽培庠序絕意逢迎時北郭柳洲令爲書役所惑敦珠具揭白上臺遂忤令意引疾歸里後李令松泰終其事已離彭三載矣以上舊志

吳會川廣東嘉應州人由舉人署彭篆廉明有威以整士習正民風爲首務試士日每題必擬作以爲多士式乾隆丙子奉 郡憲董榕札重修縣志率都人士互相編纂後之重輯者咸奉爲矩臬焉

高尚禮山西太原人由舉人令彭澤性剛直聽斷明決不執己見或有未當者卽自爲平反考試必拔眞才盡心

撫字乾隆丁亥邑大水洲民流離轉徙彭向無賑例公力請於 大憲得賑全活甚衆後以胥吏被累囊橐蕭然居彭三年士民競供薪米去之日父老多流涕者

鄒 儀江蘇無錫人由舉人授彭澤令爲人鎮靜非公事不與紳士接見詞訟審察民情必求公當吏胥莫敢一言考試盡心甄別務得其人士民有廉明之稱

葉聲遠福建侯官人由舉人署彭篆甫下車考試詩文必細心校閱嘗曰初心不負正欲留讀書種子振興春衣書院培植文風蒞政三年士民重之

鞠 偉山東海陽人由舉人署彭澤縣事明敏英果不優柔以養奸時鄰邑歲荒流民竄入彭境道殣相望公設

法安撫捐俸瘡之剖斷公允從不株連一人嚴絕苞苴
力除積弊人多以戴澤未久惜之

朱坦直隸清河人由附貢署彭澤縣事存心清慎聽訟
公平遇事能擔當有膽識不肯阿諛脂韋以取悅馭下
嚴明吏役恒畏憚焉

陳昌祚湖南祁陽人由舉人署彭篆清慎自矢斷獄明允
廉察不受胥吏欺罔刁民斂跡不敢健訟彭民愛而畏
之

秦紉武江蘇金匱人刑部侍郎秦瀛子也由監生署彭澤
彭多猾吏每新令至設法繫援一墮其術中則舞文弄
法自此昉矣公下車不通請謁吏役肅然考試遴拔得

士培書院典膏火教學規條循循有序獄訟速爲結斷
無因循拖累弊濬衣疏食自奉曰俸錢盡民脂膏不可
長奢侈風惜居彭未久士民望之如歲焉

劉輔世清江縣人由拔貢任彭澤教諭爲人平易端方訓
士勤懇士多以文詩質每月課輒與諸生詳晰論文士
咸相鼓勵焉二年以事去士人惜之

丁焯高安縣人由舉人借補彭澤訓導性沉靜和平朴
誠無粉飾接見諸生藹然如師弟且曰士貴立品勿徒
事章句爲取科名計也掌春衣書院課士有法文章嚴
理脈重經術遊其門者多取法焉

歐陽德榕安福縣人由拔貢選彭澤教諭兼掌春衣書院

課士勤敏以詩文質者卽爲改正好引誘士類尤工書法媚秀不減少年

彭雲駒寧都州人由歲貢任彭澤訓導經史淹通品行方正課文以理法爲宗訓飭以敦倫修行爲要平居儉約自奉不計脯修時教諭羅興派年差少每事必敬讓彭益自下人謂一時得兩賢

魏廷佑廣昌縣人由舉人任彭澤教諭溫厚和藹令人可親常以端士習爲訓時邑創建考棚製文勸輸邑人倍加獎勵旋以疾卒於官士民惜之

萬雲霞新喻縣人由拔貢任彭澤縣教諭性廉靜寡欲接見士子春風和氣藹然詞色之間訓課有方以培植發

育爲首務踰年卒士林惜之

邦賢

宋

張夢祥登宣和六年進士端康中欽宗北轅夢祥禁從被執不屈金主義而釋之歸隱仁磯終身不仕時人高之稱仁山先生祠鄉賢

高天錫號竹澗宋季嚴禁道學考亭之學幾廢先生究心理學探不傳之秘續欲絕之統往來白鹿洞溯致知主敬源流期於深造辨理欲審華實一時學者始知所宗趙忠毅嘗云與友人高竹澗講明性理之學其推重如此一日吟臥正寢俄云我欲還造化舊物矣奄然而逝

黃海縣志 卷之九
祠鄉賢

元

陶號璿字均政明經修行鄉里推其孝第大德間縣尹曹靖國表薦於朝授本縣簿祠鄉賢

明

黃 信由貢舉入監洪武二十二年任湖廣監察御史歷廣西按察使尋陞湖廣布政使所至有聲晉右副都御史剛正不屈深得紀綱之愷彭邑德望公爲首稱云祠鄉賢

歐陽尚誠賦性孝友值元末兵亂練衆保障鄉人賴以安皆太祖征陳友諒師駐彭澤尚誠率其衆齎牛酒勞師

友諒平召至京師錫以開國功臣匾額復賜聯云大江東去幾千里白下西來第一家卽授世襲本縣令力辭授本縣丞仍賜鐵券銀碗遣歸以保障功祠鄉賢

劉 隆字尚文本姓王洪武中由貢舉入監授廣州府同知勤於政事擢福建參議未幾調廣西閩之士民慕其惠澤上疏懇留轉陞福建按察使巡視海道備倭甚整寇不敢窺居官三十年清操如一祠鄉賢

劉剛字性冲澹義不苟取事親曲盡愛敬洪武中舉孝廉授浙江仁和令清操苦節有范丹之風

柯振祖性穎敏博學善屬文制行剛方不徇時好洪武中舉賢良方正授湖口學訓諸生肅然

凌守誠洪武間以人材舉用授興化府倉副使以卓異聞擢知浙江金華府有三異政改知廣東韶州府威上特知厲精政績擢應天府府尹居官清白宦橐蕭然祠鄉賢

王奎字友文永樂初舉賢良方正以母老不就後縣乏令當道檄奎署事時早寇爲虐奎祈禱精誠入廬山求水道遇僧沈覺顯爲書二符持歸至縣而雨是歲豐稔倍常祠鄉賢

周泰亨永樂乙未進士授廣西道御史巡按直隸湖廣克振憲度百僚肅清終湖廣按察僉事

劉昱永樂乙未進士授刑科給事中剛直敢言屢有建

白於朝行已端方士論重之

歐陽剛字元用宏治間由太學生任南京北城兵馬指揮清慎自持授福建邵武督糧通判轉徐州知州力請解組歸之日行李蕭然年踰八旬無疾而逝祠鄉賢

艾琳由歲貢任湖廣景陵縣丞致仕生平慎言篤行好學甘貧祠鄉賢

陶圻字仲廣幼警敏不羣識者規爲偉器補邑庠生督學馮公大奇之取冠多士正德中以歲貢授順天大城學訓轉山東商河教諭獎進士類名彥多出其門在商河有訟子不孝者有弟訟兄者名諭之以孝弟皆感泣悔過評事劉睿以誑誤杖死櫬歸貧不能葬爲白當道

仍捐已俸助之流賊剽掠商河有二女被執誓死不辱為具聞其事表揚之告休歸諸士攀留甚摯折博學精書隸所著有五倫箴家禮便宜詠史考正時年六十三不疾而終邑人舉祠鄉賢商河亦祀名宦祠

丁

湛字子一嘉靖己丑進士擢工科給事中正直色立朝多所建白轉吏科左給奉命典試己亥扈駕南巡條陳事宜務從簡約官民稱便晉禮科都給事中時嚴嵩當國湛疏劾其奸詔杖闕下幾斃論理邵武邵士乏科目久湛為遷學訓課士風彬彬感惠立祠鐫秩量移南曹擢四川參議會川東大綬湛多方經畫民賴以生者數十萬人中丞上其事特賜優獎白草寇川南勢甚熾直

指袁奏遣湛勦撫番人效順稱貢所歷郡邑祠祀不絕已而巡浙海道有勦寇功考績離任四閱月矣黃巖失守嵩猶追罪之落職家居布衣蔬食淡如也嵩敗當道交薦起廣西參政尋轉按察使平徭種之變擢陞河南巡撫引疾歸居二年危坐中庭與二子剖析陰陽書未竟而卒祠鄉賢

陶欽夔字克諧母夢日墮懷覺而生嘉靖壬辰進士授大理評事擢御史世宗幸鄧中欽夔以扈蹕行時上方嚴明羣臣兢兢救過不贖河南御史坐謫戍上命擇可者以聞衆推欽夔倉卒被命百務倥傯咄嗟以辦豫民不擾於是上知陶御史賢賜食寵以金幣河南饑欽夔疏

請帑金數萬賑之全活甚多上賜盡心安輯四字褒之
北敵入寇上疏引宋司馬韓范諸公以責分宜語頗切
直分宜啣之遂補太倉兵備時海寇方熾欽夔勤撫多
功外艱起復備兵襄陽五溪蠻弗靖巡撫林雲同以宿
望薦公加叅政備兵辰沅欽夔計擒其酋龍許保餘黨
悉遁南土以寧晉湖廣按察使轉河南左布政使疾作
告歸終於家欽夔器宇淵宏機神敏捷遇事持大體不
務苛察在辰五年尤多奇功今洛楚中俱有祠

陶欽臯字克允生而穎異八歲能文日覽千言終身成誦
年十六母喪蔬食三載鄉閭稱之弱冠補弟子員時大
饑卽上書兵憲陳救荒策後師事涇野呂公講陽明之

學呂公器之由是厭薄凡近歸作日新考以驗獨知毅
然以斯文爲己任嘉靖庚子以禮經魁鄉薦登甲辰進
士授刑部主事改御史因爭辨東廠擅擬人命中官呼
爲大膽御史庚戌京師戒嚴分守三門運籌巡衛至不
遑食者七日時閉城乏薪水民情恟懼臯力疏請開一
門賴以不困尋奉命募兵徐准人樂應募旬日得勝兵
數萬事聞上語輔臣曰朕固知其有才也巡撫眞定風
紀獨持生平危言讜論具在奏疏中將膺大用竟以疾
卒於冀州賻志弗終時論惜之

曾遜本籍九都橋亭人其先曾承四者從常開平王入
鄧故子孫世籍鄧中爲安陸衛人遜少有大志以聖賢

自期遊序屢試有聲由貢士授金堂縣尹在任八年政
教大行嘗捐俸以佐民賦民愛之如父母不合上官飄
然引退行之日囊橐蕭然士民繪像立祠以曾孫省吾
貴贈工部尚書

曾 輝遜之子少承家學見古人忠孝大節卽發憤思躬
蹈之稍長多病父母戒毋苦舉業輝曰丈夫不仕則耕
耳安能自逸取敗乃力耕爲養家用以饒遜尹金堂爲
廉吏有令名輝能仰承之平生重倫理矜名節不喜知
人過聞輒掩耳遇人有急赴之恐後終歲家稍落稻甫
登場責者環立輒散盡卽糜無餘藏不計也終身止一
紵衣雖敝不垢食不重味母壽八十輝亦六十餘事之

猶嬰兒之在膝下比臨喪哭泣擗踊哀動鬼神每祭輒
涕泗橫流雖八十後不少替謂終身慕者非與輝雖隱
於耕手未嘗釋卷所採錄經史百家名言及自著漫興
詩歌數卷藏於家其詩諄教子若孫惟一厚字郡守禮
請鄉飲數不就括蒼鄭公躬造庭勸駕爲一往因謝曰
某布衣分不得枉尊重所未敢就者懼不稱折福耳子
璠刑部員外郎比考績將膺封未及三月而輝已臥疾
不起彌留之際次子跪請曰地封將至願上冠服輝搖
手曰兒休矣君命一日未下我猶布衣第還我角巾野
服葬爲安也卒贈刑部員外郎以孫省吾貴屢贈工部
尚書

歐陽一敬字司直號柏菴其先祖奕宋天聖中知江州因家焉八世祖尚誠從明征僞漢授彭澤縣丞遂世爲彭澤人一敬生有至性岐嶷不羣登嘉靖己未進士授蕭山令爲政廉平以愛人爲本民多訟一敬剖決無滯庭清獄空自奉儉約常祿外一無所取時海寇有警浙總制官銜命勦捕虐御郡縣一敬獨持禮不曲徇取媚總制初欲中傷之廉知其賢更寵遇之薦於朝三載績成內召蕭人若失慈母爲立祠尸祝旣拜刑科給事中劾罷禮部尚書董份遷兵科都給事言廣西總兵不當用勳臣因劾恭順侯吳繼爵罷之以俞大猷代寇大入陝西劾總督陳其學巡撫戴才俱奪官又以軍政劾英國

公張溶浙江總兵官九人不職俱貶斥世宗覽疏謂輔臣徐階曰此豈歐陽修裔乎何文章氣節多似之也冊封襄藩辭王所餽兼金珍異遣賜於家卒弗受自嚴嵩貶言官爭發憤議事一敬尤敢言隆慶初適新庶政有言官論時事被黜一敬聞而嘆曰此豈新政所宜有耶上章請解已職畀之以通言路時輔臣高拱恃講讀恩熏炙一時一敬屢劾拱威制朝紳擅權專國亟宜罷黜已而陳兵政八事部皆議行南京振營兵由是罷去積患遂除中官呂用等典京營一敬力諫事寢以故直聲振朝野俄擢太常少卿乞假歸杜門謝客於公府一無所干己巳京察以清華無忝瑣闕有聲註考劄取供職

明年染疾屢疏乞歸解組南旋行至德州卒年四十有八生平慷慨有大節諫垣章疏切中時艱位躋要軸卒之日家無餘貲時論咸痛惜之戊寅督學江公以東采公議祀鄉賢

王演疇應斗孫也字孟箕號震澤萬歷辛卯舉人壬辰進士授南京工部營繕司選廣西桂林知府居官廉潔不苟一錢乞休時家無長物惟古書千帙及石刻各大家帖耳雅好著書善詩賦工真草錢板刻石寶其墨法不減二王著有王氏家訓古學齋醉陶和陶集諸書學政黃汝亨疏請祀鄉賢祠初仕爲寧海令士民感惠立祠曰永思

曹文縉字聞冲號昆吾萬歷辛卯舉人戊戌進士素行孝友謙冲初任刑部主事立朝忠貞不避斧鉞以建言國本不合落職後光宗卽位嘉其忠直賜功在國本匾額贈光祿寺丞祀鄉賢

劉日曦字取初號赤城萬歷庚子由選貢中式南闈壬戌成進士選江陰縣令值魏瑞崇建生祠職遂去官起浙江龍游縣令龍俗苦盜曦以法捕之一時屏跡轉都察院經歷晉南京兵部郎中勳戚強宗見曦拱服撫衛衛軍修明器械兩大司馬交疏薦擢浙江叅議未任告老職素行嚴毅居家孝友每朔望必集鄰里子姪講聖諭六條殫心易理著易經通解暨時習錄鏡心錄舉業發

機等書癸酉卒於家督學侯公特舉鄉賢浙亦舉祀名宦

周禮嘉字體亨號鈞冲萬歷庚子舉於鄉生而穎異篤孝友因母老就萬安教諭陞四川江津令清操自持時奢賊據渝所掠郡邑望風披靡來攻江津嘉焚香告天曰城破我必不生乃廣募鄉勇竭力守禦凡兩閱月知賊已疲出與之戰賊遂潰孤城卒保隨以監軍同秦良玉用計擒賊恢復全省兩臺序功交疏特薦應召入京植魏璫勢熾遂致仕歸人服其識祀鄉賢

計成久號葛初中萬歷己酉鄉試任廣東海豐令地近海倭屢爲患久至庶惠孚民防禦有方寇不敢窺願聽招

撫積寇以平鄰邑俱賴以安海豐爲立生祠崇祀名宦著有知新錄藏於家

柯友桂字侶仙號籊菴崇禎辛未進士授金壇縣知縣歷湖廣驛鹽道擢按察使賦性不阿胥吏多憚之

喻以恕字心如崇禎進士初任工部主事管太倉庫清釐出納餘羨皆記籍纖毫不以自潤性寡合爲忌者所中左遷浙江處州府司李恬然赴任益勵冰操治城旦書輒多所平反乙酉轉秋官郎中更大故旋里未一載書志以終少貧家無寸產後亦宦棗蕭然著有硯畚草檄圍集四書詠明詩起古學彙存諸書

何九達字行可號養冲以選貢任來安知縣耿介清慎當

道咸重之致仕歸卒年九十餘鄉人以德星目之

國朝

劉 曉字映葵少負志節

國朝定鼎開闢閩澳曉挾策行間佐參帷幄康熙元年壬寅以人材授宜章令旋轉永寧知州民以福星呼之十三年甲寅討平吳逆曉以司道能員之薦取用入廣從將軍傅宏烈進勦有功授平樂知府隨領兵攻取賀縣殺賊萬計入奏進取機宜稱

旨授叅議道銜賞賚有加禮旋募兵入粵加監軍道隨師戮力進勦蠻荒所向無敵每以勿殺平民勿擄子女申戒軍士本年分守廣西右江道西人德之建祠祀焉
缺裁續補浙江糧道詢民瘼革陋規吏肅風清人莫敢以非禮犯者註上考二十八年

聖祖南巡召見丹陽口

上曰此百萬軍中一書生也賜鹿尾一錫本年夏因病乞休卒於家曉性孝友尤慷慨好義著有從征錄南北遊草

劉

堂字衢又號克菴爲諸生刻苦勵行教授生徒卽講

求仁民愛物之理丙子丁丑連舉鄉會授鹽亭知縣有惠政以憂解去民送之皆泣下時有宦囊似水淚珠滿船之句人以爲實錄服闋補汝陽令清聲益著 行取

吏部稽勳司主事歷考功文選正郎旋轉給事中學科

印兼理錢局當

世宗新政勵精圖治堂期年七上疏有嚴保舉以杜濫進移權關以全商船減浮糧以甦民困等議

帝頗納之最後論科臣與臺臣體統不協遂抗章激臺臣語頗愇

上以堂平日自稱實心爲國且有膽氣置西塞忒斯軍中三年

召還堂既自西歸家居猶蒙

聖眷子鎮寶詒選

上溫語及堂者再

清問鎮寶曰爾父在家可好投鎮寶雲南令給假省親

時堂已八旬鎮寶欲請留養堂曰吾苟

聖祖養養多年厚恩未報今老矣爾當竭力報効毋以我爲念鎮寶殉難烏蒙堂聞之三嘆子能捐軀吾死亦

瞑目矣年八十四卒於家堂在諫垣久凡所奏贖歸卽自焚其草姪鎮國侍堂京師記其五疏所著有克菴

制藝鹽亭詩草各一卷子四鎮寶以忠顯語在忠烈傳袁學謨字迪來家世儒術少貧嗜學研經汲古得其根柢

壯客金陵操選政與許泰交及太史王晦友善盡通經史百家言甲午迄甲辰鄉會皆以五經雋時人目爲袁

五經丁未年五十九以進士授石樓令石爲晉屬邑多逋賦謨至治以寬政貸民牛種繼出歷年養廉代輸積

連民賴以甦次勸農田興義學脩志繕城掩露幣除樂籍居七年調繁汾陽汾俗險健下車大書八字於庭曰冰心到底鐵面無私一時豪猾斂跡人謂治石以恩水也治汾以威火也皆本經術爲治云又二年以循卓遷安寧知州旋改處州同知抑強扶弱課士愛民上官皆賓禮之歷署郡篆在金華尤多善政時各郡士民交請留治者以萬計蓋幾幾乎古循吏風焉辛酉年七十三卒於官謨性孝友厚族黨置義田立規條以明道希文自期邑復柳洲謨與有力屢校關事薦士皆得人所著有居易堂文集浙中新集二集文皆實政學士周長發序其學有體用司寇劉公統勳曰處爲醇儒出爲循吏

余於袁梅谷見之梅谷謨別字學者稱梅谷先生云

歐陽枚字卜一光長子性孝友寡言笑受學於劉克菴先生之門爲文簡練有體年十六補弟子員旋登己卯鄉薦雍正戊申授直隸懷來令政尙寬平以愛民訓士爲本自奉儉約養廉外絲毫弗取時明倫堂圯枚捐俸重修與諸生不時講學儒風以振邑罹水災給民籽種冬則按口捐賑民以慈母呼之初邑西有古惠民渠旗民構訟案塵莫決枚至不避豪強愷切敷陳請題開渠得允溉田數千頃全活甚多懷邑路通三口差務劬午枚晝應差事夜閱案牘嘗自言曰一息尙存此志不容少懈卒於官士民建祠祀之

以上舊志

柯欽錦字毓菁號子亭性英敏沉毅家貧嗜學淹通經史諸子百家言作文有奇氣甫冠由邑首食餼登乾隆辛酉賢書試禮部入明通榜補景山官學教習期滿授福之光澤令任三載勤於撫字補賸社穀創興書院勸士民力學敦行率多善政大吏知其賢調繁候官省會衝難案贖蠲集抵任未踰年積案俱清上憲信任益專每郡縣有疑獄悉以委之鮮不治者俸滿例陞同知撫軍陳以廉能寬平保舉知府引

見記名候陞同任護海防糧廳事刻無寧晷積勞成疾己卯四月病篤顧弟璠囑曰我居官兩地六年未嘗誣一駑枉一法死可不恨但父年近七旬不能終事今復

不得面訣罪深重也閏日卒於官年三十有八至今閩人誦思之

凌廣赤字表光號心培少穎異弱冠補諸生乾隆庚午仲兒汝綿捷秋闈赤中副車旋中壬申恩科舉人四赴禮部試不第由大挑得山東朝城令會賊匪王倫滋事大兵屯臨清時流亡載道各營汛恐賊匪暗雜其中不敢納赤密爲防檢聽之過獲生者億萬人賊平以功晉萊州守未詣任改授浙之金華其先世守誠公嘗守是邦邦人聞而慶幸焉嗣以正直忤上官解任去明年見天子於武英殿上嘉其功曰朕知爾老實人爾仍勉爲之授福建建寧知府郡遇水災城未沒者三版民舍

蕩然赤給貲營建且請蠲賑旋擢福建糧儲道郡士庶繪棠蔭圖送之未幾臺灣亂中丞徐公方伯某公提刑某公同視海疆以公有居守才奏請委任全省事是時公身佩數印裕如也後因屬縣監犯逋匿部議降調歲庚戌恭遇

高宗純皇帝八旬萬壽公入覲補刑部主事 恩賜與千叟宴優獎甚渥今 上元年秋八月緣病請歸初公之補金華也長子鳴盛蒙 特恩授廣西藩司少參進遷直隸霸州知州未赴而卒公曰天竟不使吾報 國耶公本壬申 恩科舉人庚午癸酉兩科例得重赴鹿鳴以憂憊故未達請丙子春始恭請赴宴 詔允而七

月戊午壽終享年九十

張光考字覲文號耿堂性孝友四歲失怙哀毀如成人事母必得歡心每負粟十數里外易肉以供餐少從其長兄繼考肄業與三兄耀考共一燈讀討論古今怡怡如也以廩生中乾隆己卯副車庚辰舉於鄉辛卯選授龍南縣教諭與縣令冷泮林倡脩桃川書院訓課有方士風日振所獎拔如徐名紱曾邦暉劉懷谷賴汝翼輩皆先後獲雋在任十四年以母喪歸服闋歷署靖安泰和南城新喻學事所至士子以文質者必爲之探討脈絡講貫義理一如在桃川時壬子選授湖南永定知縣永定舊屬大庸衛乾隆元年始改縣地僻民悍稱巖邑光

考長於吏治日決數獄無留牘乙卯逆苗滋事官兵由
承順進勦俱經永邑修理橋道給口糧難民來境者則
捐貲撫恤及辦運軍需火藥無稍誤會教匪蔓延南楚
邑東四十里坪民爲所誘惑亦約期舉事時都司陸祖
德調赴鎮守兵少尤考預布偵卒盡得其滋事姓名
遣城內外紳士與有舊者先往安輯良善並令擒惡自
効潛帶兵役繼之以是悉就捕誅受僞劄者九名餘各
配遣有差自是永邑安堵次年罷歸優遊林下十餘年
口不言貧子鋪枝官編修手書惟盡職業戒躁進每謂
少年浮露鶯名爭進終非遠大之器丙寅得超擢中允
信尤諄諄以感激圖報爲念著有識山堂詩古文制藝

稿十二卷

曾遜遇字弁庶號衝垣少有至性讀書作人皆凜庭訓必
根柢聖賢大道幼聰穎十歲能文出語輒驚其長老由
府首拔入郡庠第一戊子領經魁九赴春闈中問得而
復失者不一次而絕不以縈懷辛卯留京師中翰朱楡
圃延入內署命庚戌春元公見菴就學焉歷掌浙之東
陽書院吉之蘇川廣興書院首以敦氣節明倫理爲重
不逐逐於文字之末乾隆乙卯恭逢
恩挑列一等籤掣福建與季弟分發山東榮城令遜達
同時出都臨別諄諄以勤政愛民致囑入閩署理清源
及潭陽卽題建寧令自攝篆以來撫恤百姓獎進士類

聽獄無小大必再三詳慎務當其情人命重案尤悉心
研究不忍遽置之法且清白自勵俸養莫友諸父老月
送薪米以助其廉戊午科充秋闈同考試官精心校閱
聯捷南宮之曾暉春林朝陽皆閩省知名士是其首薦
也庚申秋七月蛟水衝城破壞民居數百戶遇一面上
聞迅發倉穀賑濟民命藉蘇者千餘人上憲極嘉許之
癸亥春以病告歸其長子守一適陞安徽休寧令病中
猶取居官切要之端手編一帙幾千餘言以示去時百
姓垂涕送至百里口誦賢邑宰不絕於途里旋壽終正
寢享年七十

歐陽大勳字紀常號約齋捷癸卯鄉試乙卯分發山東署

海豐縣事挑修河壩夙夜在公勤勞頗著未至海豐時
邑有狼患又蝗食二麥勳抵任痛自刻責齋戒泣禱城
隍廟願以身易民害狼悉去蝗不爲災越一年授卽墨
令慎刑獄崇學校立孤貧院施給衣食每月朔望必聚
士民於忠孝祠告誡勸諭胞誠懇至墨之人樂而安之
如得慈父母三載謝病歸士民交請攀留者以萬計及
勳卒墨之人立祠祀之額曰遺愛聯曰三載仁恩流德
水萬年崇祀比桐鄉勳爲人嚴教自持不苟言笑性儉
約雖在署中婦女不輟機杼子弟未有衣裘帛者

忠烈

宋

顏希孔任本縣簿德祐間元師陷安慶進薄江州希孔率
民兵八百人大聚舟楫各載巨石接戰江中飛石四擊
鼓譟競進敵幾敗已而石盡力屈被執死之民求其尸
葬於鳳凰山麓祀鄉賢

元

劉受二五柳鄉人至正間以貢任池州府推官張士誠倡
亂受二領兵戰於城西渡口敗績衆皆逃受二還城死
守城陷不屈死之

明

歐陽尙八尚誠之弟也從征友諒奮勇直前遇害喪元猶
乘馬馳走如生至家乃墮祀鄉賢

通志

王廷翰勇敢善射正德己卯逆濠之亂遊兵劫境翰率子
弟鄉兵奮前擊賊連斃二人矢盡力窮爲賊所害

通志

洪維翰字楨南號元礪萬歷甲午舉人任四川梓潼知縣
時奢酋爲亂翰誓死守遺眷先歸募兵乘城叛戍陳大
義等爲內應城遂陷縛翰說降不屈賊斬兩僕以懼之
翰不爲怵惟求坐正堂而死賊許之翰乃衣冠北面再
拜賦忠字詩九首有呼籲知難通帝座魂飛萬里只孤
忠之句遂遇害事聞勅贈尙寶寺正卿蔭龔嫡子九江
衛千戶祀鄉賢著有春秋倫訓行世

通志

國朝

宋衡若宋六習十二都鄉勇也康熙十三年十月土寇陷

湖口及彭澤縣令喻良知力不支攜印衝城而出城遂不守寇大肆焚殺四出劫掠至亂石灣口本寨鄉勇合力競奮橫截賊路格殺數寇衝若六習二人爭先格鬪衆寡不敵遂被殺事聞本府嘉其義勇檄喻良優恤其家

劉鎮寶字楚善號恕齋給諫堂三子少讀書十行並下通經史素以忠貞自矢堂在軍塞鎮寶隨焉雍正三年

詔歸五年由舉人試中翰

世宗問其父堂堂家居狀鎮寶對稱

旨

上謂鎮寶明白精采特簡雲南知縣鎮寶請假省親許

之至七年抵滇時相國鄂公總制滇黔廉其才委以鎮雄州丈壘期月報最鄂尤重之題授烏蒙通判分駐大關鎮事兼守令鎮寶撫循苗疆勤慎有法不二年而邊政肅清建城設堡民歌頌焉八年秋逆蠻寇烏蒙蒙距大關頗遠鎮寶在滇省聞變鄂公以其有邊才使馳烏蒙調度鎮寶星夜馳數百里及至城下賊氛大熾招撫勸諭皆不聽遂冒矢石入城與都司劉崑守備馬秉倫知縣賽枝大等悉力禦敵崑等陣亡鎮寶猶率家僕劉陞陳紹與賊巷戰殺賊無算至力盡罵賊不絕口途遇害大兵平烏蒙始獲其屍於城北隅已暴露十餘晝夜矣事聞

天子追悼贈雲南按察司僉事遣官致祭崇祀忠義祠
賜全葬知縣何炳奎爲誌墓表道鎮寶年二十七庚子
舉於鄉至庚戌殉難年三十七

御製祭文恭錄藝文
卷首 以上舊志

汪

銓字熙載號立齋守備琮之子少英敏隨任漢江知
忠孝大節授例授府叅軍籤掣秦省歷署縣尉州佐上
憲重之乾隆甲寅冬補漢中經歷明年春委署褒城令
褒小而衝素稱難治從容布置不踰年而事理民安復
委兼攝沔冢往來兩邑之間多善政每念褒邑土城難
備不虞遂捐廉築建并修巽序暨文昌閣魁星樓又以
城苦缺水於署西相地鑿井得甘泉民卒賴焉時教匪
滋擾羽檄紛馳軍火儲積轉輸絡繹絲毫無累民間丁

已夏賊攻褒日夜率士民登陴守望誓於衆曰城亡與
亡宰之責也第何以保我民百姓皆感泣乃募壯勇增
軍械挖濠濬溝渠戒嚴以待賊等直犯城下見有備而退
是秋賊破留壩司馬齊公司獄黃公遇害聞信馳往殯
成禮並收同知印篆撫軍永保急嘉之卽委護留壩事
制府松筠至留謁見時力陳棧內官民疾苦爰設法調
劑官民並受其福是冬奏請實授褒城令制府長齡以
軍糧孔急檄調從戎司一切度支出入十月賊擾鳳翔
各邑制府督師堵勦四路供運無缺因題擢同知補
留壩辛酉三月運餉楊鎮營遇賊於城固之大壩力戰
身受矛傷十六處罵不絕口遂遇害時年三十有五同

死者都統和騰額李殿魁也家僕李忠楊喜亦死之樞
軍陸有仁以事聞

恩旨悼贈知府照例議恤給雲騎尉襲次完時 恩騎

尉世襲罔替卹賞銀叁百伍拾兩全葬銀貳百兩一次
致祭銀壹拾貳兩著翰林院撰文祀名宦忠義鄉賢各

祠

孝

元

李時建安鄉人冬月母病思得魚羹時攜筌求諸港終日
弗得伏地痛哭俄有老叟問之告以故曰傷哉貧也乃
導之一港使舉筌遂得鯉歸作羹奉母病卽痊今名其

港曰母鯉港至壬戌詔旌表其門

黃 貴字天錫號曉厓由貢監任徽州黟縣丞少居父喪
鄰家失火延燒將及貴一無所顧惟撫棺號慟哭聲動
地衆憐而舉之火尋滅

明

蘭

榮字貴顯厚重簡默事親至孝親疾必親理湯藥四
時新味親未嘗不敢嘗親喪哀毀泣血及葬廬墓三年
不脫衰絰居繼母祖母喪孝誠無間以醫名世壽六十
七終

劉仕禴字維時嗜學恬退父疾晝侍湯藥夜清枕席奉繼
母章氏無間言章前夫之子竊金家人言之禴若弗聞

曰失母懼心得金何益老年扶杖登邱壟猶潸然泣下死之夕懼然曰今得侍父母地下矣其孝心純篤如此王守中字一道號繼存割股愈父疾母喪廬墓三年朝夕奠祭如生逆濠之變縣不守守中稚牛瀝酒斂衆殺賊擒二渠魁餘分竄鄉人賴以安有友謔某者二子皆不肖一日攜千金授中曰唯子可託故相累以養衰年有餘子自取之謔歸忽暴卒二子方爭不已中間卽負金還之二子感嘆爲改行生平潛修不求人知別號不欺以自勵云祀鄉賢

周禮讓字我華幼孤事母至孝年七十常作兒舞以娛親口不言老閭邑公舉其孝屢與鄉飲歲設捐廩賑乏稱

貸者輒焚其券有鬻妻者代贖之其孝義至今膾炙人

口

劉克仁字本心早失母事父古直翁善色養執喪如禮結廬墓左朱草生羣鳥集大中丞朱公廷聲奇其事撰至愛說遺之仲子鑲亦以父之事祖者事父人謂劉氏世孝

單 泰號舒菴性篤孝壹志溫清不求聞達父卒朝夕哭踊幾至喪明母喪廬墓虎至不懼歲殺收養族人之乏食者壯未受室貧不能讀書者皆依助焉

國朝

周易元字長文號髻岑登甲午賢書學正守嚴性尤篤孝

早失怙泣血廬墓邑令董襄以其孝聞司理胡公宗虞
旌其廬曰閔會匹亞後仕宜春教諭

時道明府廩生性至孝舌耕養親因父食茄致疾泣墓三
年終身不復茹茄母病衣不解帶者七晝夜初聘殷氏
女未嫁得痲疾殷欲易婚道明不允至殷死乃娶館宿
松拒私奔女有貸以貲者聞鬻婦卽焚其券更贈以金
縣令董襄以孝義雙全旌其門

沈壽兒凌伯權妻之前子也八歲看演葵花記感割股事
越二月母病壽兒禱於天效其狀密割臂煎以奉母次
日創甚不能起繼父問之給曰臂患癰欲視則堅覆被
臥少間再問則曰痊矣忍痛侍母如常時明年夏脫衣

見癩母大驚壽兒佯以卽前病癰處母熟視泣曰得母
吾病時割股耶凌曰若赤子何曉此壽兒不得已以實
對嗚呼八齡孺子尙知割股以療其親爲成人者當若
何惜乎當日之旌表弗及也

陳以思陳其位子也嘗割股以療父疾後其子生員陳復
亦割股愈親病孝子生孝子可以徵天道焉

汪懋映縣令董襄舉其孝司理胡公旌之

曾立羣字宗乾癸巳 恩科舉人三載失怙事寡母計氏
以孝聞庚寅赴考道間母喪跣足匍匐走十餘里號哭
不絕聲抵家水漿不入口者三日母葬居廬三載與兄
立用食必共席兄或外出晚歸必迎至中途孝友之風

至今感歎

何邦準字聖音幼失怙母教之學卽知自勉長補邑諸生
一日母頸患毒鍼藥莫施準口吮膿血五日而愈及母
卒茹素三年生平仗義有肝膽時邑有里役遞年諸弊
準力請革除至今稱便又有同里某貧極尙累虛糧三
石比追幾斃準憐其無辜爲遍請前買主攤除若干餘
悉代賠其好義又如此

計大衍字易象天性純孝竭力事親養不缺勞不怨身抱
病猶扶杖詣寢門問視臨終囑子婦曰爾善事祖母吾
得瞑目矣弟兄四貽置田產但收荒蕪人稱薛苞之亞
葉本和字次惠事母氏周極孝養母年六十九病幾危和

夜禱請以身代割股和藥母飲得愈及母卒廬墓三年
後其子宗權母病時亦有嘗糞割股之事人推肖子
計必達字又逢庠生天性孝友母病侍湯藥衣不解帶兄
死鬻產以殯又分貲給寡嫂有古人風

曾宏建字象文幼失怙家極貧事母孝忍飢寒以奉甘旨
及母卒哀慟久而弗懈死時囑子曰吾母備嘗艱辛未
獲厚葬今家雖少裕爾等當以吾之葬父母者葬吾愼
勿從厚彌留之際猶惓惓不忘如此

凌志慧性孝事親色養不怠子欽拱克承父德侍疾居廬
無所修飾鄉里具請縣令劉進贈以一門雙孝匾額

易宏觀字陔生歲貢生性孝年十三父歿哀毀骨立母患

疾疾親口吸代吐母卒葬荒郊親結廬墓側作有居廬詩

畢增輝字襄庭邑增生性篤孝以訓蒙養親雖貧甘旨必備及親歿執喪三年哀如孺子每逢忌辰必備酒果以奠丁巳元日母樞火延輝拼力護救抱棺而死聞者傷之

丁 蓮字茂罷家貧為諸生不屑屑於科舉之學以行己敦倫為本嘗讀詩至相在爾室躍然起曰聖賢提耳之教莫著於此門堂戶牖皆以四字銘之自少以孝聞鄉里父歿居止常依其母後館於姻舍聞母至軒渠提舞如嬰兒母去郵郵若有所遺居喪露處墓側晝夜攀樹

摩石而號逾月毀沒知與不知皆哀之

時 至字建五邑庠生家世業儒父早歿每讀父書必涕泣母老多疾侍湯藥衣不解帶倦則倚床而瞑母憐之曰兒不堪矣復改容承之母故廬墓三年以哀毀致疾臨沒以父手帕先儒格言付子其終身思親如此

饒卯君農人也母病痰痺涕淚交流每食卯君以身掖母卽與共器而食見者輒唾安之弗覺也如是者二十七年及母死每過墓必泣徘徊依戀如孺子焉其孝得諸天性者如此

宋允侶九都人幼失怙與母相倚母病篤允侶祝天割股和藥以進病得痊居常晨昏定省靡不曲盡母沒數十

載一日夢母曰吾兒歸矣旋發癩痕而死享年八十

汪 鵬字敦誠邑庠生生母早喪時切思慕或言及輒潛然淚下父病竭力延醫不以貧少懈居喪三年常如新喪之日事繼母得歡心臨沒出館費囑妻子曰留此以養吾母

周汝金性孝幼喪父哀毀幾不起母病癘二載金口吮膿血母死哀毀亦如喪父斷暈茹素者五年里人稱之以

上舊志

歐陽賞字紹師邑庠生性孝友勇於學弱冠能文章有聲庠序間爲人篤厚敦樸常曰處世察察不如其渾渾與

人惺惺不如其惡惡識者以爲名言賞母程治家嚴肅

年九十餘孫曾數十人或少失母意必呼而撻其所尊賞時年幾七十常跪而受杖於庭杖重則喜杖輕則憂或不杖必下氣怡色柔聲俟母怒釋呼起然後去故其孝行尤爲宗族鄉黨所稱

高 雯字昇遠別字弁亭邑增生少喪母每忌辰輒齋沐

焚香讀書至子生三年然後免於父母之懷泣然泣下

朔望必肅衣冠問安於父榻兄弟同居最爲友愛二弟

故子甫六齡幼弟繼亡遺腹生子雯少則撫養長爲教

誨不異己子幼穎異過目輒不忘邑侯李松泰取以冠

軍有聲庠序間每試文出人咸誦之旣而屢困秋闈遂

絕意進取惟閉戶讀書斂身正坐晚歲好子史手披口

吟達且忘倦猶時時思念父母弗衰作家聯云持已遵
三畏存心凜四知可想見其梗概卒年八十有六

義

明

段堯服邑庠生娶汪氏善事舅姑堯服硯耕江北歲一還
家賴汪以紓內顧己而汪卒堯服年尚壯感其孝不再
娶崇禎戊寅督學侯公按試學舉堯服義夫發落諸生
侯公極加獎賞且歎義夫最難云

歐陽舒號龍橋性溫厚有行誼歲捐租給貧宗族有難婚
配者各資聘金並無德色

何彥彰字景光慷慨識大義河泊所舊有逆沙夾額外魚

課河水漲涸廢常而鈔課征求定額民甚苦之彥彰獨
毅然上請宣廟詔免其租人恒德之

劉世揚字汝登敦孝尚義患邑戶多虛糧逋賦日衆嘉靖
四十二年訴當道舉丈量賦役得均民賴以安

計 瓚字君錫剛直敢言請免縣前洲課除解竹木諸費
軍人懷其德

時邦晚性喜讀書輕財樂施嘉靖甲戌歲大饑疫道殣相
望曉爲賑貸不責償出洲地四千畝給牛種令親友分
種歲稔亦不取租其子大宗萬歷己丑歲稔遠近求糶
曰吾積穀以備荒也豈爲值乎人各給穀少者以斗計
多者以石計

計如週字子郁家素饒豪俠好義值鄉里饑爲粥賑濟三
月賴活者多邑令雷時敏表其事於巡撫楊成旌以尚
義匾額

國朝

王 柱字宇瞻邑庠生性嚴肅不苟笑言娶童氏相敬如
賓年二十七童故一子數齡有勸之續娶者則婉辭謝
曰吾幸有子可以己矣日則授徒夜則侍父潔居三十
餘載邑令李松泰特嘉獎之

曾珙章字共玉邑庠生少有志操動履不苟嘗爲鄉里平
訟指示之曰此陷穽也人以爲名言族有祭田所入一
秉珙章歲貸之秋計息斂焉歉則停息十有五年所貯

粟約千餘石會歲大饑殪殍載道珙章出所貯以賑鄉
人無菜色者人乃知珙章昔非計利也爲今日儲外府
耳

歐陽煥旭字浴旦正直慷慨重義輕財康熙十年邑大饑
煥旭糴米數十石煮粥施賑本鄉

劉根漢字炎甫嗜學好義康熙辛亥大饑煮豆粥賑鄉人
三日又冬日遇覆舟者凍將死漢解衣衣之其人歸備
禮致謝弗受拜祝曰願公子孫世世昌隆漢生子傳爲
名諸生孫堂吏科給事中曾孫鎮寶崇祀忠烈至今劉
氏一門書香接跡可爲積善成德者勸

項繼儒字翼先弱冠有聲賢序康熙初役派里長糧無牒

勞重爲民累繼儒力請各憲役賦以平通邑賴之辛亥
歲荒施粥賑飢全活者衆邑令李遙獎以德望如歲區
額甲寅土賊猖獗鼓義勇捍禦殺賊地方悉保邑令喻
良親書義奮敵愾旌之晚歲建宗祠刊家訓王令廷藩
贈以貽謀翊化吳令士宏著其才德首薦賓筵

張啓時字四如四都人輕財樂義恩篤同宗惠及姻婭康
熙丙申出粟賑饑凡遇歲疫傾囊施藥學使徐昂發贈
以匾曰令德永芳年五十始舉森杏杰三子人咸謂德
之所感云

萬 珍字君玉賦性醇篤疎財重義昆季三析居已久兩
弟家漸落心傷之曰何忍我有餘弟不足也爰出己產

再爲分助明末左逆之變兵虜一少婦嚴氏置寨中時
君玉無子贖之爲妾挈至家再四詰問婦以有夫告君
玉悽然不忍犯命婢女爲伴另居一樓後婦母家訪至
欲攜歸君玉恐有別故不卽與出數金令回籍招親夫
至順治二年親夫于騫仲果至婦語以故感激不已玉
并贈路費遣還後別娶側室生子善一曾孫卷遊邑泮
元孫人傑登乾隆丙子武魁任泗州衛千總至今松騰
聲皆列膠庠人以爲盛德之報

柯炳煥字讚文少孤長事孀母克供子職生平疎財好施
予汪家渡捐貲置義船建橋亭行人利濟遠近賴之復
建大埠頭洪湖石橋數處古稱好義其庶幾焉

田蟾春字桂友敦善行喜周卹嘗遇寡人遺金泣於塗蟾春解囊如數予之不求償凡鄰里飢寒者悉叨其惠不炫已長不言人短邑有盛德之稱

曾遂盛字大乾少失怙事母孝質敏嗜學尤喜讀易中歲絕意名場以教子課孫爲樂家故饒嘗曰積而不能散是守錢虜耳周人之急救人之災建橋創亭費百金無吝色年七十七臨終于孫環侍猶眷眷念窮民之苦其好善樂施如此

高 魁字英萬邑庠生家素封謹飭自守慕義好施親族貧窘賑恤不啻再三丙申歲荒出粟賑飢全活者衆凡遇道斃者必捐棺以瘞之人感德焉

許殿邦邑庠生性好施與惜災濟急雖傾囊不吝適抵南郡有鬻女者曰萬氏萬固世族殿邦憐之携歸養爲己女嫁王門康熙丁卯邑西門火災殿邦出粟周之邑令端木象謙贈以春回月旦匾額

高士奇字平六好善樂施康熙丙申歲飢士奇捐米施粥以飼餓者鄉里全活甚衆郡守王眉敷旌以惠濟流芳邑令劉進旌以惠及鬻桑匾額

汪 潛字元常少英俊喜讀書長補邑弟子員方正自持於當事無干謁性尤童義輕財康熙甲子歲里有鬻妻償債者臨別號泣潛聞之得其故卽解囊二十餘金俾得夫婦相保越數日踵門叩謝潛曰惻隱之心人皆有

之吾豈望報哉至今傳爲盛德事

劉道震庠生尙義好施康熙丙申邑大飢出粟賑貸全活者衆邑令陳夢盛贈以眞儒惠濟匾額縣東烏砂坂地當通衢舊有橋雲傾費重修以利行人三都大泊湖夏秋水漲兩岸相距不辨牛馬雲捐囊以助舟楫邑令宋若臨申詳郡守劉賜以好行其德匾額

朱孔道字聖由好施予歲飢捐穀以甦困乏嘗道拾遺金候還之遺金者分酬弗受鄉黨推重舉列賓筵

高士前字在瞻國學生慷慨好義乾隆癸亥冬米價騰貴民艱衣食士前捐米以濟飢者製棉衣百餘領以給寒者時多賴之以上舊志

高世俊字又千號謙堂援例授州司馬性孝友幼失怙恃專祖母奉養誠敬祖母年九十四俊溫清不怠兄嫂早亡俊懼沒大宗之產俾之承祀與弟友恭七十載生子八教以義方俱列膠庠乾隆丙午隣邑大飢俊賑粥周濟農人有屨佃未輸者俊給食并與牛種使耕如故親友凡有忿爭俊賠貲勸釋力解其紛管理春衣書院隆師敬士雅重斯文三十餘年弗懈邑中大務每推俊首俊不辭勞瘁不避羣囂歷任邑侯咸敬信之

篤行

明

畢瓏字士賓孝友信於宗族鄉里有爭多取平焉課子

彭澤縣志

卷之九

篤行

七

讀書尊師友始終無倦

國朝

項作璉幼失怙鞠於母氏學成而母復逝傷不逮養遂絕意科名謹身敦倫與鄉飲縣令龔九鼎爲作隱君傳

何兆愷字君孳少負才名因子圖書補弟子員遂不就試

築室山中琴書自娛不近顯官居恒布衣蔬食嘗語人

曰當爲造物惜福

畢煥芬字實右郡庠生孝友傳家詩書垂後至性剛方言笑不苟焚券濟貧士民稱之

歐陽晟字長寅都司鉉季子年二十舉己卯鄉試甲辰成進士聞母病歸未抵家而母故晟以祿不逮養遂絕意

仕進歲時祭奠哀毀如初喪誠動左右與伯兄光仲兄燧友愛一堂怡怡如也性嚴毅剛正不假人辭色邑公事多倚賴之人每服其公平他如解囊全節出粟賑飢成人宗嗣其美舉更難屈指臨沒誠子勿專浮屠今皆仰其風云

汪在衍字廷嘉郡增生幼賦岐嶷器宇淵粹鄉試三薦不售遂絕意進取著有澹園文集玩月軒小草當時珍之性孝友事親誠恪常以忠信篤敬自銘每呼其子漣清誠曰儒者立身天地間當處事無忽心與人無欺心然後可以中行獨復故其子文行交修皆衍之教也而遇事剛方正直仗義輕財尤有古烈士之風

袁勳元字紀常天性孝友讀書貫穿經史尤究心黃帝素問之學負經濟才不得志遂假岐黃以濟世家世清白相傳鉛華弗事爲鄉黨法邑令吳士宏舉飲賓焉子三以次子學謨貴贈處州同知

何邦英字若采篤學純行補邑弟子員教學三十餘年里中名宿多出其門範身以禮法未嘗繩人然望其儀度自生敬畏雖素狂放者胥斂容肅志也公正渾厚終身不入吏庭允稱有道君子以子儻貴贈建昌府教授

凌應臚性穎慧善屬文補邑增生足跡不履公庭生平存心忠恕無怒言忿色鄉里咸親愛之父母逝哀毀骨立手足折撫姪如己子尤爲大節可風

汪之淮字會沂邑庠生性喜書籍時左寇燹民居至淮室見積書充棟不忍焚生平以篤實自處雖饒於財無驕人之態常分有餘以濟人之急積券盈筭不償不問也晚歲以遺書課子孫戒勿市利而失忠厚之風至今鄉里多稱之

歐陽映翰字雲祥號篤菴厚重少文治家一以禮法子孫數十人舉食長案分長幼列坐內外肅然鄉黨晉接非衣冠不敢見買山葬母置祭田不派及兄人以孝友目之邑令吳舉爲飲賓子六五光緒字繼承庠生有學行舉鄉飲正賓

饒有任邑庠生舉大賓性質直以古道自處而待人温和

雖對僮僕雍雍如也教子弟務以禮法見坐立跛倚必面責之每日人家子弟多以縱而敗以嚴而成吾寧爲其嚴者享年九十臨終整衣冠而坐猶以謹飭自好諄諄訓誡後人

鄧林正字雲樹歲貢生聰穎嗜學善屬文屢試冠軍邑中知名士多出其門生平質樸嚴毅以禮自律亦以禮律人見人有過輒攢眉若不可與一朝居其梗概如此汪通治字霖潤邑增生性豪邁有膽識遇事輒能擔當及爲諸生沉潛伊洛之學不尙浮夸嘗語學者曰時藝弋取科名耳實在工夫須從倫常着力倫常有忝百行莫贖故一時從遊者多謹飭之士

項師昶字重裘性穎異讀書輒不忘髮年補郡庠壯歲領歲貢生平嚴於自律足跡不履公庭文章品誼爲邑推重知縣李祖旦嘗過廬咨訪贈以君子人也匾額繼任李松泰會立傳以紀之

凌應拔字居謙少聰穎因母患瘋疾讀書寢門弱冠補弟子員旋中庚子副車資硯田以奉親上有五兄皆早世撫諸姪恩同己子嘗立宗訓二十條諄諄訓諭族人教授生徒亦以身體力行爲要士林中首推篤實焉

周九穀字孫貽郡增生侍母瘵疾周旋調護久而弗懈宗族以孝稱穀愀然曰職分事耳何敢言孝又嘗拾遺金一囊守失金者還之生平多懿行有雅度邑令劉進稱

夏清縣志 卷之六
爲金玉君子

程謙字士光邑廩生敦尚樸誠斥遠浮佻妙齡入黌序屢困鄉闈絕無愠色惟恂恂然恪守臥碑課徒教子以讀書窮理爲務提學王嘉其篤行舉優示獎

周家震字六長稟性孝友制行純篤每言讀書做人必求實有見地屢試不遇規行矩步人咸尊之

歐陽明泗字儒瞻性謙和有量讀書淹洽以接引後學爲事嘗戒其門人與子曰君子小人分途不外敬肆二字作功過箴規書於屋壁以自警 以上舊志

劉世楷字廷謨號慎菴邑增生世居卓里身負異才而務爲沉潛之學嘗謂讀書不通經史如無楫而渡江河居

心不曉大義猶無炬而入幽室孝慈友弟忠信篤敬乃食之醢醢不可一日無也識者以爲名言措處家庭如對大賓未嘗有情容居鄉能任恤不爲財吝歲歛捐費賑濟洲民邑侯高尙禮嘉其行以同拯疾苦旌之後建立家塾置義田教子孫讀書立品高又親製序文署篇首曰樂善不倦顏其塾曰月嶺子孫庠序相望以禮法稱於士林曾孫種桃由辛酉拔貢入仕元孫法賢弱冠登賢書

劉名青字匡夏幼穎悟侍父習舉業父故伯仲分析青獨依母居迎妻張氏歸躬督稼穡棄詩書不事曰與我讀不成毋寧留以待後人性孝友每自外歸必先趨母所

問飲食勞苦後家小裕居室湫隘弗計先營書室數椽
延師教二子處家最儉惟奉母與師不少吝鄉里貧乏
者量力周之喪不能葬者助以棺材居後有涼亭一夕
風雪中自有死者青聞之即買棺葬於亭之西岸其孫戴
銘石墓前號為涼亭君者是也村西有毛姓無主墳三
塚青每歲清明必祭之戒子孫使勿失今亦立碑墓前
烏沙橋有陽某者一日來償負問其由則出妻金也青
切責之却不受為人正直誠樸寬厚和平待家庭鄉里
從無芥蒂以是咸敬愛之家有老婢常囑家人曰此姥
及汝輩五六世矣先人所遺必善待之其教子孫卒以
讀書忠厚為本故至今不失家法長子遇以府首補郡
增生次子達太學生遇子韻誦歌綬皆增康生敵中乾
隆壬子第一名舉人曾孫開元開一皆列庠序夫婦俱
八十餘歲

曾慰考字思孝號龔堂世居縣之九都喬亭祖心省歲貢
生任臨江府訓導父宏緒拔貢生中式康熙己卯科舉
人龔堂年甫七齡父歿事母氏朱最孝敬待兩兄駕友
子之誼刻志讀書學先根抵補邑庠生屢赴鄉闈未遇
構家壑額以先甲山房授經於斯惕惕然以承先啓後
為念取詩書中及先賢格言手鈔成帙每日清晨焚香
默誦天保以荅

君恩誦蓼莪以荅親恩其餘有裨性情心術者一一如

之教子弟有禮法待人嚴正不苟狂放者望之自爲敏
容遇事平以禮規以義從容勸導衆志帖然稱服不至
搆訟於廷鄉隣人心風俗之美競推曾姓橋亭族生子
三長選遇乾隆戊子科經元官福建建寧縣知縣次道
涵歲貢生季選達乾隆庚子科舉人官山東榮城縣知
縣長孫守一乾隆丁酉拔貢由永新縣司訓陞南康府
教授旋任安徽休寧縣知縣現任山西萬泉縣知縣長
曾孫怡志郡庠生現分發安徽候補州同其餘或列明
經或遊黌序皆龔堂培植之力也享壽七十有五 勅
贈文林郎

袁大中字篤忠少有文名爲邑增生初中父學謨家貧嗜

學客遊京師二十餘年始領直隸鄉薦成進士當學謨
留京未貴時家愈貧幾無以度朝夕大中挺然自立不
以貧累其母汪宜人賢淑益激勵之以故有聲庠序得
爲名諸生後累試不售遂援例授光祿寺署正中之爲
人也慷慨顧名義由貧困轉歷豐亨都如其素嘗曰不
能貧者必不能富以貧爲己貧富爲己富必不能貧富
者也又曰讀書之苦莫如貧天下以貧而失學者誠惜
乎其人也於是捐置義田族中貧乏者俾之學凡試場
資斧廂祠祭祀取給焉享年六十

曾

述字孔源邑庠生賦性剛直笑言不苟事父母備極

孝敬處兄弟無分畛域好施與重然諾學宗朱程質樸

有古人風建置山泉書屋爲義學藏書數千餘卷以延
師課讀爲急務值歲早分積穀賑卹困窮鄉人不戒於
火出貲力救贖人鬻妻終不告人每歲臘底其村有孤
貧無依者必計口分給寒衣錢米贍之鄉鄰咸頌不衰
今子孫皆成名

朱清晟字寅畏郡廩生性篤天倫老猶孺慕父母卒哀毀
幾絕每至墓所必悲號終日不忍去其學務根柢訓子
弟禮法森然家貧授徒於外每教之敦倫立品不徒拘
拘於文字之末以故遊晟門者率皆務本士卒年六十
餘子師洛郡廩生

汪拔字翠山號應菴髫年補弟子員素以孝友聞父老
倦痿痺行止不遂拔常負之宴遊族里以博其歡兄早
故拔撫孤姪如己出凡祖宗墳墓祭產多捐貲培植之
親房無嗣之墓嘗爲立碑使無或失拔爲人寡言笑守
正不阿常榜朱子格言於室每月朔必焚香讀之家世
豐厚而儉樸自處見親族貧乏者恒憐念周恤至今鄉
里猶稱之

計偉字國光號恕堂太學生資稟勁特氣節光明而充
養沉粹無復圭角敦行孝友克底雍和強恕之中若有
成法平居恂恂無甚可否及酬酢事故斷以義理則有
截然不可犯者稀年寧沒之秋一方皆爲感悼

儒林

黃清原元

卷之九

三

宋

鳳可翔雲漢龍紹興間豐城陳自俊於掘劍池南創龍光書院聘清江陸子澄講授其中四方學者雲集二子不遵厥家負笈重趼歷年二紀於子澄微言緒論無不貫徹由是充然有得厥棄時名業龍光者以二子稱首

明

陶欽民字克明六歲入里塾如老成人長遊邑庠力學不倦有詩云千古孔顏真樂地直須尋到上頭來陽明王公開府豫章欽民徒步從之繼膺鄉舉遊國學師甘泉湛公復師涇野呂公皆推重焉

高 廉字尚潔遊邑庠以次當升太學親老致養遂不應

選別博士詩云長揖謝塵囂搔首歸田廬篤學慎修編
衣藜羨忻然沒身人稱淳庵先生

馮世盛八歲能文鄉里目爲神童長遊湛甘泉之門督學
高公必亨試以傍花隨柳根極性理盛爲推重所著有

三泉稿

王奉玠號象絃邑廩生少穎悟過人試輒冠軍遠於理學
所著先天後天聖賢心傳諸書焦漪園先生曾訂行世
以親老不就辟舉爲人篤於孝友邑之黃耆無不慕焉
年及期頤一日集子弟談龍溪語錄忽神倦而逝流風
餘韻被於隣境迄今宿松烏池有王公祠春秋享祀歲
以爲常子心約字彥博學精品潔能世其業

國朝

何圖書字學傳性敏嗜學淹貫經史百家言植品以古人自律雖燕居必正衣冠邑令王廷藩慕其賢造廬致敬焉由歲貢任鉛山訓導造士有法多士仰爲山斗解任歸杜門著述有明察須叅經務通旨天涯識路石麓溪聲周易銘等集鄱邑受業大司成王傳爲之序以無力錢梓今多散佚

王應昌字又介由歲貢授樂平訓導年已八旬猶勤於學居官十載著四書五經通旨等書理本朱程爲學者宗

學使魚鸞翔贈號西山先生入樂平名宦

以上舊志

何璿字瑜三號果園又號如葺乾隆甲辰歲貢孝事父

母居長兄喪哭盡哀與人和藹終日振襟危坐動必循禮爲諸生名噪黌序務根柢之學於十三經皆手鈔成誦諸史子集詳加評點著有四子講義左傳類纂諸書一時名宿多出其門胞姪謙士喆皆其所裁成今江左池州守內翰蔡名炯者亦嘗請業焉邑侯高公蟠敬禮之每商校文藝親造其閭鄉閭三薦未售遂就職訓導賣志以歿

歐陽汝顯字起巖五歲失恃奉繼母以孝稱昆弟間友愛悉至性嗜讀弱冠補弟子員旋食餼讀益力致得咯血疾淡于上進年四十餘恩舉明經惟課子弟是務嘗誨諸子曰凡人讀書非博富貴利達也讀書所以明理

理明則知義命庶無非分妄求之事爾曹勉之年七十餘選廣豐縣教諭本無意仕途因廣豐地近鵝湖先儒講學之地人文最盛欣然就道下車時進諸生勤講課嚴取擇以孝弟實行爲先單寒之士尤加意體恤士類感德慕行以文翁目之司馬胡公光祖推爲風範卓絕解組日諸生祖饒攀轅泣下汝顯爲人沉酣六籍下筆千言每試輒列前茅試文一出家吟戶誦兼精醫理十不失一然以幣逐者輒謝不往卒年八十三子三人皆諸生孫曾輩悉列膠庠不愧家風云

洪立模字貞運邑廩生敦孝友篤品行士人重之爭遊其門教人一一以古人爲範使生徒錄史傳嘉言彙行於座

右其不善者亦手錄而朱抹之以爲戒嘗謂門人曰讀書貴治其心耳因以奮心署其室且屬聯云立定脚跟趨實地抖開肺腑對青天年六十項貢未試而終著有五經條辨長子文炳歲貢生次子麻辛酉拔貢皆庭訓力也

文學

明

王應斗性敏學博爲文千言立就少時以詩謁大司成魯公鐸云幾年道德仰餘光千里湘流上小航爲問門牆如許大也容後學拜秋陽魯公見詩倒屣相迎遂爲忘年友司夏津訓轉諸城諭士式楷模嘗鑄祭器濟貧生

尋歸著歸田錄

何 煒弱冠有聲藝林遊鳴山詩云十年燈火聯清夢萬

里風烟浪白頭所著有瀛河集古錄

國朝

宗元泰字晏如所居容膝耕硯養母不喜習經生業嗜作詩與邑先達喻以恕劉覽元酬唱喻劉咸推重焉詩清致瘦韻其入山草人多傳誦

何兆蕃字子宣邑增生幼穎異淹貫經史尤精易學究河洛理數參邵子書每占驗合符迥異識緯家數尤工書法才力過人然每避橫逆尚道義不任客氣人恒難之家素豐財捐貲卹困破產不顧會里雜額無定奸胥苛

索累民蕃奮身以狀聞臺院邀請豁免里困以甦鄉里德之以孫儻貴贈建昌府教授

洪岱齡字瞻巖號靜菴爲諸生時文名籍甚由邑廩登康熙戊午賢書授鉛山教諭卓異陞吳縣知縣吳稱劇邑俗離下車後釐奸剔弊士民德之己卯同考得人爲諸房冠如汪份諸晉尤最著者每得書暇手不釋卷其仕優而學如此

凌應治字允康號鳳林康熙甲子舉人幼聰穎讀書卽曉大義長益嗜學尤精周易所爲古文一切皆近裏者己之言遊其門者卒成名士先是彭邑賦役未均有當年遞年之累治仗義鳴公勒碑永禁至今賦役稱平尤好

獎拔士類後進每仰爲山斗云選山東金鄉知縣未抵任卒著有鳳林存稿

歐陽璞字廷礎郡廩生少奮志讀書過目輒通大義凡傳注所未及者往往以意會之爲詩古文詞典博深厚淺學莫能窺其底蘊生平以古道自處不尙華飾治家必以禮法閭門之內肅然晚歲杜門養重惟以教子課孫爲樂子三儀崇禮皆讀書自好克世其家

周易斌字竹友邑增生其父鄉賓禮重產斌最後九歲始就學性穎悟從名師遊博子史工詞賦郡守江殷道器重之晚設棗竹園家塾杜門訓子惟吟詩自娛以樂天
年

汪在璽字辰玉號耐齋歲貢生性孝友淹貫五經有文名年逾六旬父泰交猶在堂父病親侍湯藥父死悲哀毀瘠三載不食酒肉兄在璞早逝璽待孤姪如己子養育教誨卒皆成立初邑人袁學謨有名諸生中號爲經哥每與璽講析傳註自嘆不如後袁以五經成進士而璽患目疾以明經終士林惜之所著有金鍼集以子鑑岩贈修職佐郎

畢太素字彥升號筠莊邑庠生性明敏博極羣書文章詩古組織成一家言著有嚶鳴雅集一時知名之士迭相唱和間則奇興丹青有規倣摩詰之意

黃紹元字萬冕號廬峰附貢生品誼端方持身廉潔性嗜

學每見奇書必重價購之家雖貧而牙籤滿架誦讀之
聲弗輟所作詩古文詞力追先正著有澄清堂文稿蒼
山鼓語詩稿爲雲間吳世賢金谿黃師圖所賞鑒孫錦
鍊銘鎮皆諸生人謂淵源有自云

劉法賢字蔚芳號又臣性孝謹天資粹美兒時其父種桃
授以孝經論語日數百言與之講論輒有心解十歲授
入股業井井有條教之引用經語漸且合其浸淫史漢
唐宋大家不數年遂能規倣神似十八歲遊泮二十一
歲丁卯鄉試主司修撰王勿菴先生以銜得之遺卷中
極相嘉賞賞之修撰胡印潛先生長齡亦爲擊節本擬
作元以搜遺乙之列第十二其爲文沉澁穠郁靈氣行

得士子心處同官惟以詩酒爲酬酢時穆堂李先生贈
以氣凌彭澤之樽光照臨川之筆識者以爲人聯雙美
云

柯友桐字榆芳聰穎嗜學弱冠通經史百家言以首選貢
入成均授興國教諭諸生進謁必爲剖析疑義語不及
私壬戌六月興邑大水浮屍不可數計友桐倡諸生訂
同善錄捐貲掩埋在任十年改大成殿葺明倫堂建尊
經閣皆親爲倡率歸里年七十餘猶購書萬餘卷其好
古嗜學蓋天性然也

丁 溶字覲宸港裔孫幼失怙事母以孝聞嗜學好古文
準先程後學多尊師之由邑廩登雍正癸卯賢書癸亥

截遠至京以疾歸沒濟爲人剛方嚴毅有忠諫風

計大表字裕中沉思嗜學彊記博洽所讀論孟學庸性理諸書無不參解精粹所著詩古文章清逸酷似晉人

田國福字攸萬英年負重名文追先正詩字爲時推重遊其門者多知名士器識淵涵絕無城府兄弟間友恭著美士林尤敬服之

凌鍾繼字述昭父早歿母歐陽氏遺腹所生幼穎異甫就塾儼如成人其祖應治曰繼子志者孫兒也弱冠補諸生益自力學從孝廉曾立羣先生遊學益進文章行誼力追古人嘗曰讀書人須從孝弟做起倫常著脚乃真大經濟人以爲名言事母孝養老而彌篤五十領歲薦

痛母苦節籲請旌表里族賢之

歐陽坦字思訓明太常卿一敬齋也年十三能文章讀書通曉大義然無學問色雍正甲辰補弟子員乙卯貢成均乾隆戊午登鄉薦當未第時出都門有他年若得逢歐冶寶劍原來未折鋒之句至戊辰果捷南宮歸以疾卒未展其志

王化字于南幼聰穎嗜學窮經史子籍天文地理及卜筮醫命之書靡不究極精微爲文章筆雋而氣昌試輒冠軍以郡廩捷壬申鄉會家極貧事親先意承志而誠恪本諸天性舉動悉以禮法自持座王金公姓贈以聯云風月襟期江海量英雄膽氣聖賢心蓋深許之也

年三十二卒於家無子士林惜之 以上舊志

歐陽鶴鳴原名銳號書山性聰穎少有異才八九歲時學爲詩古文詞卽能驚人稍長博覽羣書究其精蘊有所作揮毫立就時人稱爲才子鶴名旣高猶思所以擴其見而閱其才於是遍覽名都大邑冀以識天下士至桐城留詩於張文端公五畝園中爲張君野堂所賞遂款至其家與若淳公弟兄唱和乾隆庚寅舉於鄉屢試禮部不第山右澤州守劉公開叢延主體仁書院澤之士奉以苦口婆心匾額門生胥名繩武令萍薊聘爲鰲洲書院山長至修邑乘結撰經營成於一手閱萍志者咸稱善焉凌公廣赤守建寧又聘主書院所至勤懇懇懇

以開導後學爲心著作甚富有文家秘要一卷行世
陶觀梅字怡然生平敦尚實行慨然有志於眞儒之學嘗曰古今文人不盡聖賢之徒也聖賢之徒卽日用尋常語天下之至文又何以易故其爲文一以醇茂古樸爲宗於制藝則取荆川震川兩家少博覽長年專致力於四子書及左氏傳其意以四書爲經左傳爲緯人能通是二書則身心之間家國之際裕如矣乾隆庚子科舉於鄉屢試未第以導引後進爲心後秉鐸南安之崇義縣崇之士稱爲惜陰先生生平著作甚富不自存稿惟晚年官崇義有崇義草尙存於家云

項 邵字新臺歲貢生資才敏捷積學淹通其著作揮毫

立就如夙構爲諸生三十餘年試輒冠軍秋闈又屢呈
薦試藝出雖老師宿儒莫不擊節稱善士宦家爭相延
致遊其門者率皆成經術士一時登賢書捷南宮者比
比也子珠光郡增生玉光歲貢生年八十猶諄諄以誘
掖爲事邑人重其品學延掌春衣書院蓋以詩書世其
家云

饒廷詡字敬存戊申副舉歲貢生饒鞏長孫也少謹樸敦
篤孝友讀書務根柢之學經史百家靡不研究評點手
抄左傳春秋易經編輯類目可爲後學津梁所作詩古
文詞宏深肅穆追宗班馬暨唐宋諸大家一時名輩如
陽湖惲敬新建曹熊咸推重之著有陶南集

汪在璽字辰玉號耐齋歲貢生性孝友淹貫五經有文名
年逾六旬父泰交猶在堂父病親侍湯藥父死悲哀毀
瘠三載不食酒肉兄在璞早逝璽待孤姪如己子養育
教誨卒皆成立初邑人袁學謨有名諸生中號爲經笥
每與璽講析傳註自嘆不如後袁以五經成進士而璽
患目疾以明經終士林惜之所著有金鍼集以子鑑岩
贈修職佐郎

畢大素字彥升號筠莊邑庠生性明敏博極羣書文章詩
古組織成一家言著有嚶鳴雅集一時知名之士迭相
唱和間則寄興丹青有規倣摩詰之意

黃紹元字萬冕號盧峰附貢生品誼端方持身廉潔性嗜

學每見奇書必重價購之家雖貧而牙籤滿架誦讀之
聲弗輟所作詩古文詞力追先正著有澄清堂文稿蒼
山叢語詩稿爲雲間吳世賢金谿黃師圖所賞鑒孫錦
鍊銘鎮皆諸生人謂淵源有自云

劉法賢字蔚芳號又臣性孝謹天資粹美兒時其父種桃
授以孝經論語日數百言與之講論輒有心解十歲授
八股業井井有條教之引用經語漸且合其浸淫史漢
唐宋大家不數年遂能規倣神似十八歲遊泮二十一
歲丁卯鄉試主司修撰王勿菴先生以銜得之遺卷中
極相嘉賞質之修撰胡印潛先生長齡亦爲擊節本擬
作元以搜遺乙之列第十二其爲文沉澁穠郁靈氣往

來戊辰公車報罷赴浙之父任益博覽羣書每趨侍左
右輒爲辨難常謂讀書人以立品爲先文藝次之功名
又次之動以范文正公歐陽文忠公自期其母何孺人
賢而多病奉養無間晨夕有所請於其父深愛和氣見
於面宛然孩提之狀已已試南宮卒於京師聞者莫不
傷惋是秋生遺腹子樹訓著有又臣遺稿王勿庵先生
有序叔祖截紀其狀

武功

歐陽瑤字中黃號鎮垣由武生効力補南湖營外委署理
本縣城守事嘉慶元年教匪滋擾四月派調帶兵湖北
攻當陽縣東門身受火傷不退賊以鐵鈎搗之幾被獲

唐 岳揮劍斬賊手奪其矛六月圍勦南門擒匪目席雲豐
等身被石傷給千總頂戴七月圍勦西門擒匪目陳大
本加守備頂戴當陽平議叙軍功加二級護理荊州營
參將印務嘉慶二年攻長陽縣示堡寨擒匪目覃加耀
進勦川陝賊匪窮追千餘里嘉慶三年雲南提督文拔
爲翼長帶領河南安徽湖北江西兵勇追勦湖北興山
鄧襄一帶賊匪沿途接仗叠受重傷積勞成病回籍調
養適寧州匪徒滋事檄調赴省借補奉新城守奉爲寧
瑞要衝竭力防禦賊不敢入境差務絡繹毫無貽悞嘉
慶九年奉

旨補賞一等傷醫藥銀兩瑤職守二十年屢著勞績卒

以疾終未竟其志

隱逸

唐

李中白號元通子邑人抱道寡合隱城東之富陽山建栢

賓亭詳皮日休記

明

陶 埜字仲文少業軒岐年十二遙菴李中丞因疹脉奇

之嘗詣陽明王公求心性之旨公曰舉世皆醉君獨醒

後遂號以醒老云

歐陽珍字良玉耽意經史能詩文甘貧樂隱不趨勢利年

八十而終

何文學字勉之篤志好古居石壁山下遇學者輒語以孝弟可爲堯舜之理卒年七十有一著蠡蟬秋鳴壁山樵唱等集

凌雲翼字雲卿邑庠生篤志佔畢不事生產後并絕意進取不復與諸生試事第雲奇字印可少時不屑毛錐嘗馬上橫槊有乘風破浪之志已而豪於詩放於酒嘗吟曰藏身金穴雖男子埋骨糟邱亦丈夫因別號酒民晚精醫爲人治病不受謝得醉而已

國朝

榮日頤字孚吉康熙庚戌與劉曉仗劍北上甲寅開漠疆順承王及都統范某副都統祖某領兵五萬長驅荆襄

掃靖餘孽攻守七年有餘日頤與劉曉從征協力調度軍機日無寧晷庚申春西南平曉以功得官日頤以母老辭歸日與親友詩酒盤桓屢薦不起范都統知其志不可奪書手援天下四字贈之清風亮節有幼安元亮之風焉

胡伯超字惟聖卜居蔣灣之月山不求聞達終身饒樂以

上舊志

張京諶九都嵐陵人性疎宕不屑治家人生產博覽史傳慕陶靖節之風自號菊存居士薄田數畝命五子種秫以供釀室中列瓶盞日與鄰叟暢飲惟四子游奉壺侍醉則爲旂講析書理俾望古作規勿樂近時儂薄習稱

里紛競得菊存一言解之咸欣服有告匱者輒傾所有
與之不少吝妻計氏黽勉同志甘淡泊賢與翟氏並稱
今嵐陵登科第者皆旂後裔也人以為有隱德云

彭澤縣志卷之九終

